

El mercato del bestiame a Buie

Al tempo de me nono o diritura de me bisnono iera duto un altro tipo de vita. A quei tempi, che lori li ciamava bei tempi, dopo sta storia che nono me ga contà no sò propio se iera bei tempi o no. Secondo lori sì. Se comincio de me bisnono che xe vivu' dal 1868 al 1972 no podaria dir che i se la ga pasada tanto ben perchè più che una cariola o un careto tirado de un musseto come meso de trasporto, altro no iera. Ansi me coregio, dopo el 1910 per el suo paese passava la parensana e più tardi dopo el 1930 se ga podù vedi qualche camion che andava vanti a legne, a vapor. Anca le strade iera poche. Strete e senza asfalto. I ghe diseva stradaregia. El trasporto sula costa andava per più via mar. Dal racconto de me nono el se ricorda che so pare ossia me bisnono el gaveva una bicicletta anca quela scasada ma la serviva quando el doveva spostarse per andar lontan. De solito nel mese de dicembre quando in quasi dute le famee contadine se macelava el porco se doveva andar al mercato de Buie a comprar el porcheto per alevarlo per l'ano dopo. Cusì se faseva de ano in ano. Per andar de Strugnan fin a Buie so pare el se prontava xa el giorno prima. El lucidava la bicicletta, el ghe dava grasso ala catena, el pompava le rode, el verdava se ghe tegniva ben i freni. El giorno de mercato, me par che iera de marti o de merco. El partiva xa de bonora co faseva ciaro, verso le sette, El se tapava ben per no ciapar qualche malan. Con lu el cioleva un sacco per meter el porcheto dopo verlo comprado. Partito de Strugnan, su verso Valeta, de là el se molava zo verso Santa Lucia, San Bortolo e pasado el Gorgo el rivava a Siciole. Fin la, la strada iera bastansa pianeggiante. De Mulin su per la Chia la iera un pocheto piu' dura con la bicicletta anca se la strada dopo i anni quaranta la iera sfaltada. Arivado a Buie el se faseva un gireto per el mercato e dopo gaver ociado dove i presi dei porcheti i iera più convenienti el se decideva e lo conprava

Al mercato se trovava de duto, dale vache ai manzi –Boscarini-, vedei, cavere, piegore, agnei, mussi, cavai e po dindi, oche, anetre, galine e tanto altro. Iera un mercato sai fornì.

Comprado el porcheto el andava a far marena, po el se faseva un quartus de quel bon moscato. Dopo ver ligado ben el sacco con drento el porcheto sul stangon dela bicicletta el tornava verso casa. Quando el rivava a casa duti a vedi sta bestiola. Duti ghe diseva –bona sorte-. Tirado fora del sacco sto porcheto el coreva su e zo per el salario. El iera propio bel. Rossicio col museto inpuntido e la coda inverigolada.